



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Suai
23 Marsu 2021

Kazu la'en oho feen: Tribunál falla atu aplika prizaun preventiva iha kazu abuzu seksuál ho natureza incestu

JSMP lamenta ho desizaun primeiru interrogatóriu tribunál nian ne'ebé aplika deit medida koasaun apresentasaun periódika semana rua dala ida ba arguidu ho inisiál DP ba krime violasaun seksuál hasoru nia oan fetu ne'ebé akontese antes, tanba ho aplikasaun medida koasaun ne'e, iha 03 Marsu 2021, arguidu komete tan krime omisídiu agravadu hasoru nia feen ne'ebé hanesan mós testemuña ba iha kazu violasaun seksuál hasoru sira nia oan fetu refere, iha Munisípiu Bobonaro.

“JSMP konsidera aplikasaun medida koasaun ne'e la apropiadu tanba kazu sira ho natureza violasaun seksuál liuliu incestu no kazu krime seluk iha risku boot ba vítima ka testemuña bainhira arguidu hela besik. Kazu ida ne'e arguidu rasik deklarata katak nia oho vítima, tanba vítima ba hato'o keixa hodi dun arguidu komete violasaun seksuál hasoru sira nia oan fetu (incestu). JSMP konsidera kazu ida ne'e hanesan ezemplu kazu konkreta husi kazu sira seluk ne'ebé liu ona, iha ne'ebé vítima no testemuña sira sempre hetan presaan no ameasa husi arguidu sira no iha potencia boot ba iha arguidu sira atu kontinua prátika tan krime seluk. Nune'e JSMP husu ba tribunál atu iha futuru tenke tetu risku sira ka sirkunstánsia sira hotu hodi aplika medida koasaun ne'ebé rigór ba kazu sira ne'ebé ho risku hanesan,” dehan Sra. Ana Paula Marçal, Diretora Ezekutiva JSMP.

Kódigu Prosesu Penál (KPP) prevee klaru kona-ba rekezitu sira ne'ebé fó biban atu aplika medida koasaun prizaun preventiva. Artigu 183 KPP kona-ba rekezitu jerál ba aplikasaun medida koasaun iha alinea b haktuir katak bele iha perturbasaun ba investigasaun ka julgamentu, nomeadamente tanba iha perigu ba prova ninia akizisaun, konservasaun ka veracidade no iha alinea c haktuir katak iha fundadu perigu ba arguidu atu kontinua atividade kriminoza ka ba atu iha perturbasaun ba ordem no tranquilidade pública, tuir krime nia sirkunstánsia ka delinkuente nia personalidade no iha Artigu 194 (nú.1 letra a) KPP preve mós katak arguidu halo krime dolozu punivel ho pena prizaun a'as liu tinan tolu tenke aplika prizaun preventiva.

Iha kazu konkretu arguidu nia situasaun preense rekezitu sira iha Artigu 183 letra b no c KPP no Artigu 194 alinea 1 letra a KPP tanba arguidu nu'udar testemuña nia la'en rasik ne'ebé sira

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
Website: <https://jsmp.tl>
info@jsmp.tl
Facebook: www.facebook.com/timorleste.jsmp
Twitter: @JSMPtl

sei nafatin hela hamutuk iha uma ida ne'ebé bele fó risku ba testemuña nia vida ka iha possibilidade bele fó presaun ba testemuña atu la fó sai nia koñesimentu ho verdade ba kazu violasaun seksuál ne'ebé testemuña iha koñesimentu. Realidade ba kazu konkretu tanba falla aplika medida koasaun ne'ebé apropriadu ikus mai arguidu oho duni nia feen hanesan mós testemuña, ne'ebé tuir lolos bele kontribui lia loos ba tribunál maibé testemuña tenke lakon nia vida.

Situasaun ne'e hanesan dezafiu boot ba iha tribunál atu asegura comunidade nia konfiansa ba iha prosesu justisa formal, kuandu tribunál la kontribui kondisaun ne'ebé seguru ba iha parte sira ne'ebé envolve iha prosesu sira.

Kazu ne'e akontese iha 03 Marsu 2021, iha oras tuku 07:00 dadeer, arguidu ba iha nia uma no haree vítima hamos hela kioske nia laran, nune'e arguidu tama tuir vítima no lori mós ho katana ho dima ki'ik ne'ebé arguidu foti iha vítima nia uma laran. Arguidu uza katana refere taa dala ida iha vítima nia kanotak, nune'e vítima halai maibé arguidu duni tuir no lori dima ki'ik sona iha vítima nia hirus-matan halo vítima hakotu nia is.

Iha 05 Marsu 2021, Tribunál Distritál Suai hala'o julgamentu primeiru interrogatóriu ba arguidu relasiona ho krime omisídiu agravadu hasoru nia feen. Iha julgamentu ne'e, arguidu deklara katak nia oho vítima tanba vítima mak keixa arguidu ba krime violasaun seksuál hasoru sira nia oan no bainhira arguidu husu osan faan fahi nian, vítima lakohi fó no tolok arguidu. Arguidu mós deklara tan katak nia hela ketak ona husi vítima depoisde julgamentu primeiru interrogatóriu ba kazu violasaun seksuál hasoru nia oan feto iha tinan kotuk.

Depoisde rona tiha arguidu, ministériu públiku husu ba tribunál atu aplika medida koasaun prizaun preventiva ba arguidu tanba komete krime omisídiu agravadu ho natureza violénsia doméstika ne'ebé ho moldura penál aas liu tinan tolu. Enkuantu parte defeza husu ba tribunál atu aplika medida koasaun apresentasaun periódika ba arguidu tanba arguidu tenke kontinua tau-matan ba sira nia oan sira seluk. Depoisde rona tiha parte sira hotu, tribunál deside aplika medida koasaun prizaun preventiva ba arguidu.

Kazu ne'e rejistu iha tribunál ho Númeru Prosesu 0002/21/BBBGD, julgamentu primeiru interrogatóriu ne'e prezide husi juis Dra. Patricia de Araújo F. B. M. Xavier. Ministériu Públiku representa husi Dr. José Elo, enkuantu arguidu representa husi Dr. Domingos dos Santos husi defensoria públiku.

Atu hetan informasaun kompletu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl